

He Ngohe Aromatawai ā-Roto Mō ngā mahi whakamahere anake

Te Ingoa o te Ngohe: Nō hea au, nā wai au?

Aronga: Tikanga ā-lwi 1.2B

Paerewa Paetae: Tikanga ā-lwi 1.2

Kaupae: 1

Whiwhinga: 6

He Tohutohu mā te Ākonga

I tēnei ngohe

I roto i tēnei ngohe aromatawai, ko tāu mahi he hanga whitiata pūrongo hei tuku ki tētahi o ō whanaunga e mōhio ai ia nō whea ia, ā, nā wai ia.

Te horopaki

Ko tāu nā mahi, he whakaatu i tō māramatanga ki ngā take tuakiri tangata. Ka mutu, ka waihanga koe i tētahi whitiata pūrongo e whakaemi mai ana i ētahi kōrero mō tētahi o ō whanaunga e mōhio ai nō whea ia, ā, nā wai hoki ia.

Māu tō whānau e uiui, ka kohikohi ai i ngā kōrero, i ngā whakaahua, i ngā whitiata hoki mō tō whānau. Kia mutu te aromatawai nei, ka whakahokia atu hei pupuri mā koutou ko tō whanaunga, ko tō whānau hoki.

Ka aromatawaitia koe i runga anō i tō kaha ki te whakamārama i ngā pānga, arā, i ngā āhuatanga whakaawe i tō whānau pērā i ngā mahi, ngā uara, ngā tirohanga me ngā tikanga.

Hei mahi

1. Tātaihia, kohia hoki te/ngā whakapapa o tō whānau. Kei a koutou te tikanga ka pēwhea nei e mau ai te whakapapa, arā, mā wai hei tiro tiro, mā wai hei tiaki, ā, mēna e pai ana kia mau ki te pepa. Ka mutu, kei a koutou te whānau te whakaaetanga kia kohia ēnei kōrero tapu nei.
2. Rangahaua ngā kōrero mō ō tūpuna me ō mātua anō hoki. Tūhuratia ā rātou takahanga me ngā āhuatanga i pā mai ki a rātou. Kohia ngā whakaahua pēnei i:
 - ngā tūpuna
 - ngā marae me ōna hononga

- ngā tūrangawaewae, ngā wāhi tipu
 - ngā mahere whenua, ngā wāhi motuhake ki te whānau
 - ngā mahi motuhake, pērā i te kuhunga ki te pakanga
 - he take rongonui pea
3. Rangahaua tētahi kōrero mō te whakapapa o tō whanaunga, tētahi kōrero anō e tūhonohono ana i a ia ki tōna iwi, hei tauira:
- he pakiwaitara
 - he take ā-whānau, ā-hapū, ā-iwi
 - he tūāhuatanga i roto i te whakapapa
 - he kōrero tuku iho
 - he pepeha, he whakataukī.
4. Tākina i mua i te kāmera, ānō nei he kōrero tuku iho ki tō whanaunga.

Ngā mahi hei tāpae

He whitiata pūrongo, ka whakaahuatia, e 4-5 meneti te roa, ā, ka āta whakamahi i ngā pūmanawa tōtika kia eke ai ki tētahi taumata ngaio rawa atu.